

Ebbaluṅa endaayi eyi Pawulo gaṅandiihira Temuseewo Enyanjula

Pawulo nj'owayinandiihira *Temuseewo* omuloobera wuwe ebbaluṅa yino, endaayi. Abahugu mu by'Ebbayibbuli bajeega baati gayinandiiha ṅagati w'omwaha gw'enkaaga n'ebiri n'enkaaga neene oluvanyuma lw'ohusaaliwa hwa Kurisito. Pawulo gaali anjira Temuseewo ng'omwana wuwe (Beef 2:22; 1 Tem 1:2; 1:18).

Yino ndala hu bbaluṅa ene eji Pawulo gaṅandiihira abaatu mu hifo hy'ehibbubbu. Abaatu abo baali nje Temuseewo ni Tito ko ni Filimooni. Mu bbbaluṅa yino, mulimo bingi eby'ohulaabbira abafugiirira Kurisito ebiṅamba hu hujumirya Hatonda (2:1-15), abatangirisi babafugiirira Kurisito (3:1-13), hu basomesa ab'obudulingi (1:3-11; 4:1-5; 6:2-5). Hino hiranga engeri eyi Pawulo gaali n'asomesamo Temuseewo ohuba omutangirisi omulaṅi ow'abafugiirira Kurisito. Era mu bbaluṅa yino husaṅanamo ebiitu bingi ebiṅamba hu ngeri ey'ohutangiriramo abafugiirira Kurisito.

Ebiri mu bbaluṅa yino mu buupi

1. Pawulo aheesa Temuseewo (1:1-2)
2. Ohulabula hu biṅamba hu basomesa b'obudulingi (1:3-11)
3. Pawulo geyaasa Yesu Kurisito (1:12-19)

4. Pawulo alaabbira Temuseewo hu biḡamba hu batangirisi babafugiirira Kurisito n'ohujumirya Hatonda (2:1-3:16)
5. Engohoba (4:1-6:12)

Obuheese

¹ Ndiise Pawulo owafuuha omuhwenda wa Yesu Kurisito olw'obuḡangi wa Hatonda era Omunonosi weefe ḡalala ni Yesu Kurisito oyu hulimo owesige.

² Kuḡandiihira ewe Temuseewo, oyu pira ng'omwana wange omwene n'omwene olw'ohufugiirira ohu ese ni neewe huli ni nahwo mu Kurisito. Hatonda Seefe ni Yesu Kurisito Musengwa weefe bahuḡambire ehisasabirisi era bahuḡe emiyaaya.

Ohulabula hu basomesa ababbaamya

³ Ng'olu nahuloma ni n'ali ni tiina e Make-doniya, nenda osigale mu Efeeso, olagire abaatu abali husomesa ebibono eby'obudulingi ebyabuhana n'ohufugiirira hwefe, bahyagamye.

⁴ Balagire balehere aḡo ohuheneranga ebiseera mu husomesa abaatu ni batambisa engano ejitali tuufu ejiḡamba hu byafaayo by'obusaale n'ohulanduluhana n'olwanji lw'amasiina g'abaahale olutahoma. Ebyo byongesa huhubba mbaha n'ohuḡahana mu baatu, mu hifo hy'ohubasomesa ebya Hatonda. Ebya Hatonda hubyoheresa ni hubita mu humufugiirira.

⁵ Ehingendererwa mu huhuḡa ehiragiho hino, hya hwenda huhubbirisa abafugiirira bendane

n’ohwenda ohuŋwa mugati w’omwoyo ogubulamo kirihindi era oguŋanga ohwawula ehiraŋi n’ehibi. Singa bendana mu sambo eyo, hiija hulaga ng’olu bagumisye esomesa etuufu.

⁶ Balala hu baatu abosomesa ebitali bituufu, ebyo babinwaho, baagobola hu binambulamo.

⁷ Abaatu abo benda basomese abaatu amagambi ga Hatonda aga abeene batategeera wayire beenjira baati bagafaania.

⁸ Hwesihwesi humanyire huuti ebi magambi ga Hatonda galoma biranji ate bisaana, omuutu anagatambisa mu ngeri etuufu.

⁹ Ne husaana hutegeere huuti amagambi sibagataŋo hu lw’abalaŋi aye hu lw’abaatu abajeemu abahola ebibi, abaganiye mu hubbenga ni batatya Hatonda, abaali n’omwoyo omubi era abatala Hatonda. Abeeti, abeeta abasaawe oba abanyinaawe ko n’abaatu abandi.

¹⁰ Abahwedi, abasinde abanenyuha n’abasinde bahyawe, abatunda mu bahyawe. Abadulingi n’abalayira ebitali bituufu, n’ebindi byosibyosi ebitolana n’esomesa etuufu

¹¹ eŋambagana n’Amaŋuliro Amaŋaŋi agaŋamba hu Hatonda oyu huŋa eŋono, aga bapambya ohulomera abaatu.

Ohweyaasa Hatonda olw’ehyere hihye

¹² Neyaasa Yesu Kurisito Musengwa weefe, owambona ni ndi mwesigwa ohuhola omulimo gugwe ko gagupambya gaahena gaapa n’amaani agohumunjeeresa.

¹³ Wayire oludaayi namulomangaho ebibi, ni ngudya abamufugiirira era ni ndi muutu

w'embaha, gaasaasira olwohuba ebyo byosi-byosi nabiholanga mu bujaayi, n'olwohuba ti naali kiiri humufugiirira.

¹⁴ Aye Musengwa weefe gapambira ehias-abirisi ehyene ehingi era gaapa n'omwoyo ogw'ohufugiirira njalala n'ohwenda ebi husuna ohunjwa eyiri Kurisito.

¹⁵ Ng'olu omanyire, efe abafugiirira huloma hituufu huuti, "Yesu Kurisito gaaja hu hyalo ohunonola abali n'ebibi." Ehibono hino hituufu hyene ehi hiisi muutu asaniiye ohufugiirira era nga mu baatu abo ababi ndiise owaali ni kira ohuba omubi.

¹⁶ Aye wayire naali mubi ohwola ayo, Hatonda gaapambira ehiasabirisi. Ese owaali ni singira erala ohuba omubi. Gaasonija olw'ohwenda ohulaga abaatu ng'olu Yesu Kurisito asobola ohugumikiriza abo abanjanga ohumufugiirira, basobole ohusuna obulamu obutanwano.

¹⁷ Ale njaaahani, hiisi muutu aje Hatonda enono olwohuba nje Habaha anuga emirembe n'emirembe, atalifa, oyu muutu atasobola hubona n'emoni era nga nje Hatonda omulala yeyene emirembe n'emirembe. Amiina.

¹⁸ Temuseewo mwana wase, kuhub-birisa ohuhola ebyo ebyolana n'ebibono eby'obunaabbi ebi bahulomaho baati olihola, konyo osobole ohugumikiriza ohuhola omulimo gwa Hatonda n'ohusoola olutalo n'obusira.

¹⁹ Yegumye ohufugiirira era n'ohola ehi omanyire ti nj'ehituufu. Abandi hino bahinjwaho hale, hyabaleetera ohugwa.

²⁰ Mu abo p'omuli Himenaayo n'Alekizanda aba nalyonjera Sitaani abatambise hiisi ehi anende baheega ohutafodogolanga Hatonda.

2

Ohujumirya

¹ Ohusookera erala, olw'ebyo ebi kenire ohuhuloma, kuhubbirisa ewe ko n'abafugiirira bosibosi ohusabirangaho abaatu abandi hiisi olu munahumbaanenga ohujumirya Hatonda. Mubasabire, Hatonda asobole ohubayeeda benenye, banonjohe. Era ni muba ni musaba, mweyaasenga Hatonda hulwa ebi aholire.

² Musabirenga habaha, n'abanugi abandi abasigaayeyo ko huŋange ohuba obulaŋi, ni huli n'edembe eryohujumirya Hatonda n'ohuhola omulimo gugwe ni ŋabula atuhubba hu muhono.

³ Hino hiraŋi era hisangaasa Hatonda Omunonosi weefe,

⁴ owenda abaatu bosibosi banonjohe era basobole ohufaania amazima.

⁵ Hiri hiityo olwohuba Hatonda ali mulala era nafaanania abaatu ni Hatonda, ali mulala. Omuutu oyo nje Yesu Kurisito,

⁶ oweenayo abe endiŋi y'abaatu bosibosi. Buno nj'obuhwenda obu Hatonda gatunambya era nga hino nj'ehiseera ehituufu ehy'ohubulomera abaatu.

⁷ Era ehyo nj'ehyagira Hatonda gaatuma ohuba omuhwenda nje nangirire era somese

Abatali Bayudaaya obuhwenda buwe obutuufu buno. Ehi ndoma nj'amazima, sindulinga.*

⁸ Olw'ehyo, hiisi olu munahumbaanenga ohusaba, nenda abasinde ni banagololenga emihono jaawe, baholenga baatyo ni babula tima oba egongi hu muutu.

⁹ Era nenda abahasi bambalenga mu ngeri etanjemula era ebyambalo byawe bibawiihenga bulani ni bitaleetera abasinde ohubegomba. Bataholanga majolobera mu fiiri jaawe wayire ohwambala embira n'emihobyoye eby'omuendo, wayire ebyambalo eby'ebbeeyi ehibitiriyiye.*

¹⁰ Cooka ebiseera byawe n'ebbeesa babinenerenga hu huhola ebiitu ebiyeeda abaatu olwohuba ehyo c'ehi Hatonda genda abahasi ohuhola, ko weeyite abo abaloma baati bamufugiirira.

¹¹ Mu hiseera hy'ohusomesa Ebyanjandihwa, omuhasi gegenga manoleeye, ni genomehire.

¹² Sifugiirira muhasi husomesa oba ohuba n'obujangi hu musinde aye asaana hunjoleera hunjoleera.

¹³ Hiri hiityo olwohuba ti Adamu nj'oyu basooka ohuwumba, nga ko baloosaho Kaawa.*

¹⁴ N'ehindi, Adamu sinje oyu Sitaani gadulinga aye omuhasi nj'oyu badulinga, gagwa mu hibi. Olw'ehyo abahasi bali n'ohwenomeha.*

¹⁵ Aye Hatonda alinonjola abahasi singa banegumyenga ohumwenda n'ohumugondera,

* **2:7 2:7:** 2 Tem 1:11 * **2:9 2:9:** 1 Peet 3:3 * **2:13 2:13:** Tand 2:7,21-22 * **2:14 2:14:** Tand 3:1-6

ohwesiganga Kurisito, ohwoheresanga obuvu-nanyiziwa waawe ng'abasaaye, ko n'ohwebisya mu ngeri esaanira.

3

Abalabirizi b'ehibbubbu hy'abafugiirira Kurisito

¹ Ng'olu omanyire, efe abafugiirira Yesu huloma hituufu huuti, "Omuutu yeesi owenda omulimo gw'obulabirizi w'abaatu abafugiirira Yesu aba gegombire ohuhola omulimo omulani."

² Olw'ehyo, Omulabirizi, aseene ohuba omuutu ow'esambo endani ejibulaho ehi omuutu gejambya. Ali n'ohuba omusinde ow'omuhasi mulala, afuga owongo, omwegenderesa, oyu baatu bana enono, asangaalira abageni, amanyire ohusomesa,

³ atali mumeesi, atali muhambwe aye n'anamba ebiitu pola, ataduhanaduhana era anjuma mulungo gw'ebbeesa.

⁴ Ali n'ohuba muutu anjuga bulani amago gage, n'abaana babe ni bamunjulira era ni bali b'esambo ndani.

⁵ Kale omuutu atananga hunjuga mago gage ameene dala, aba ananga atye ohulabirira ehibbubbu hy'abafugiirira Kurisito?

⁶ Nehindi, sibirani Omulabirizi gaaba omuutu owahafugiiriranga Kurisito, olwohuba omuutu hy'oyo ahanda geehudumbasa, ehyo hyamuleetera ohumusalira omusango, ng'olu basalira Sitaani.

⁷ Asaana ohuba omuutu oyu abaatu abatafugirira Kurisito bosibosi baṅa eṅono. Olwohuba aṅabula ehyo, baaja humulomaho ebibi ataṅanga hulomeranga abaatu ehibono hya Hatonda bamuṅulira, ate hino nj'ehi Sitaani genda.*

Abadiikoni

⁸ Mu ngeri nj'enyene, Abadiikoni boosi basaana ohuba abaatu aba baṅa eṅono, abaloma amazima, abatehapira mwenge era abanuma mulungo gw'ebbeesa.

⁹ Bateehwa ohufugiirira obuhwenda obuṅamba hu Kurisito. Hino bali n'ohuhihola n'obulamu waawe wosiwosi.

¹⁰ Era ni bahiiri hubangala ohubaṅa obuṅeeresa buno, beheererenga babahebera babona hanye baṅanga ohuhola bulanji obuṅeeresa buno ni ṅanuma hya hubenambya.

¹¹ Mu ngeri nj'enyene, abahasi baawe* boosi baatyo, bateehwa ohuba abahasi aba baatu baṅa eṅono, abataṅaayirisa aye abegenderesa mu hiisi ehi bahola era abesigwa mu hiisi hiitu.

¹² Mu bufumbo, Omudiikoni ali n'ohuba omusinde w'omuhasi mulala era n'aṅanga ohuṅuga obulanji abaana babe, n'amago gage,

¹³ olwohuba abaatu abanweeresa obulanji ng'abadiikoni, mbaba abaatu baṅa eṅono era n'abeene boosi baba n'obugumu ow'ohulomera abaatu ebihya hu hufugiirira Yesu Kurisito.

Ehyama ehihulu

* **3:7 3:7:** Tit 1:6-9 * **3:11 3:11** Oba abadiikoni abahasi.

¹⁴ Wayire nga suubira ohuuja mangu eyi oli, kuṅandiihira bino olw'esonga ti,

¹⁵ singa ṅabaṅo ehindwiihise ohuuja, obeenjo n'omanyire eby'ohusomesa abaatu bamanye ng'olu Hatonda genda abaatu baholagane hy'abaana abomu nyumba endala era nga bo nj'abaatu† ba Hatonda Omwene Bulamu era esiiro eyi ohufugiirira obuhwenda wa Kurisito obulaṅi era obutuufu, bwediye.

¹⁶ Aṅaṅuma hubuusabuusa, Hatonda gaatuwihulira ehyama ehiri mu hufugiirira Kurisito ehiroma hiiti:

“Hatonda geebonesa eyi huli ni gambaaye omubiri hy'omuutu,

Omwoyo wa Hatonda ng'ahahasa ebigholanga.

Abamalayika baamubona,

Hatonda ng'amunira mwigulu mu ṅono ery'amaani.

Abafugiirira nga balomera abamawanga ebimuṅambaho,

Ng'abaatu bamufugiirira.”

4

Abasomesa ebitali bituufu

¹ Omwoyo Omutukuvu atulomera buhomya ati mu ndaalo ej'oluvanyuma ṅalibaṅo abaliṅwa hu hufugiirira Hatonda, babbaamira hu baatu abasomesa ebitali bituufu ebiṅwa eyiri Sitaani n'emyoyo ejibbaanya.

† **3:15 3:15** Oba ehibbubbu hy'abafugiirira Kurisito.

² Abasomesa abo balyeranga ohuba ti basomesa bituufu ate nga budulingi wereere. Baliba egubbe, abamalimbe natanjulira, ni batafaayo oba ebi basomesa bituufu oba byabudulingi.

³ Baligaana abaatu ohuhwa n’ohufumbirwa era njalino n’ebiryo ebi baligaana abaatu ohulya ni babiranga by’embiho ate nga hiisi hitu Hatonda gahitereeyeno abafugiirira era abafaania amazima bahitambise ni bamweyaasa olw’ohuhibanja.

⁴ Olw’ehyo, hiisi hiitu ehi Hatonda gatonda hiraŋi era njanjuma hisira, kasita omuutu geyaasa Hatonda ko gahitambisa,

⁵ olwohuba ebiitu byosibyosi bifuuha hiraŋi olw’ehibono hya Hatonda n’olwohubisabira.

Omujjeeresa omulaŋi owa Kurisito

⁶ N’onalomerenga aboluganda ebibono bino ebi kuloma, onaabenga mujjeeresa omulaŋi owa Yesu Kurisito era Hatonda aja huhunangasa mu hufugiirira nomu bujjeeresa n’abita mu bibono ebituufu ebi waafugiirira.

⁷ Wenjale emboosi ejehinjere ejibula mahulu ate ejitanjooma n’ohunaya. Aye wenaseho esambo ey’ohuhola ebi Hatonda genda.

⁸ Hola hino olwohuba ng’olu olulomo luli, “Hiraŋi omuutu ohunasa omubiri gugwe ohutamba n’amaani olwohuba hino himuyeeda naali mu bulamu wuhu hyalo huno. Cooka ehisinga obulaŋi hwenasaho ohuhola ebi Hatonda genda olwohuba hino himuyeeda n’ahiiri mu bulamu

womu hyalo hino ko n'obulamu obu husuubira ni huṅooye mu hyalo hino.”

⁹ Ehibono ehyo hituufu olwohuba esuubi ly'efe, abafugiirira liri mu Hatonda era hiisi muutu gaahali ahifugiirira anabula hwemoota.

¹⁰ Hino nj'ehigira ni hufaabiina ohubona ti huhola ebi genda, olwohuba Ye Mulamu era nj'Omunoṅosi w'abaatu bosibosi, ko weeyite abafugiirira Kurisito.

¹¹ Ebi kuloma bino, bisomesenga abaatu era balagire ohubyoheresanga.

¹² Otaganya baatu huhubisyamo emoni olwohuba ti mbo ohiiri muṅere. Ng'olu hiri ti omuṅere ahubba eṅoma omuhulu gaahina, weesi fuuha ehy'ohuboneraho eyiri abafugiirira mu malomere, mu sambo eyi webisyamo, mu hwenda ohu wendamo hiisi muutu, mu hufugiirira huhwo nomu bugwalaafu.

¹³ Yeegumye ohusomeranga abaatu Ebyaṅandihiwa, n'ohubabuulira n'ohubasomesa ebya Hatonda, ohwola olu ndiija.

¹⁴ Otagayalira hutambisanga ehirabo ehi Hatonda gahuṅa olu abatangirisi babafugiirira Kurisito bahufuujaho amate bahwabula baahena bahusabira olu bahutaho engalo.

¹⁵ Omanyanya otademba huhola ebi kuloma bino era bitengeho omwoyo, abaatu bosibosi babone ng'olu weegumisye ohugendera mu magira ga Hatonda.

¹⁶ Bona ti weegumya ohugonderanga Hatonda mu hiisi hiitu n'ohusomesanga ebimuṅambaho ebituufu, olwohuba n'onaholenga otyo, Ha-

tonda alihunonjola ewe ko n'abahutegera ohutwi n'osomesa.

5

Obuvunanyiziwa bw'abafugiirira eyiri abaatu bahyawe

¹ Omusinde ahahiraho emyaha otamuhayulanga aye muṅooyingenga n'omulabula ng'olu wahaholire lataawo. Abavubuka ab'oluse lulwo banjirenga hy'abalebe babo,

² abahasi bahulu n'obanjira ohuba hy'abamaawo, ate abahasi abahiiri abanjere n'obanjira hy'ababoojo babo aba otaṅanga husobya ni nabo.

³ Nṅanga abanamwandu abanjuma abanjambire hu muhono, obuyeedi.

⁴ Aye namwandu anaba n'abaana oba abejuhulu, abo babenga nj'abamulabirira olwohuba obuvunanyiziwa obu hiisi afugiiririra Kurisito ali n'ohwega ohwoheresanga, nj'ohumanya ohulabirira abomu mago gaawe, n'asasula abasaaye babe ebi bamuholera, olwohuba ehyo hisangaasa Hatonda.

⁵ Namwandu oyu muteehwa ohuyeeda nj'oyu abuliriraho muutu yeesi amuyeeda, oyu suubi lirye liri yiri Hatonda yeṅene era asiiba omuusi n'owiire ni geṅunderera Hatonda amuyeede.

⁶ Aye namwandu aba mu hwetolyonga n'ohwesangaasa omwene ndamanya Hatonda, wayire ng'aba ahiiri mulamu mu bulamu ow'omwoyo aba hy'omufu.

7 Laabbira era olagire abaatu baholenga baatyo natabaño kadi mulala abaho ehy'ohumunanya.

8 Singa nabaano atafaayo huyeeda abalebe babe, ko weyite abomu mago gage abeene, aba gegeene ohufugiirira era aba mubi ohuhiraho n'atafugiirira Hatonda.

9 Namwandu ahiiri huñesa emyaha nkaaga, otamuñandiihanga hu lukalala lw'abanamwandu abohuñ obuyeedi. Omuutu oyu onañandiihanga nga namwandu ali n'ohuba ni gaali mwesigwa eyiri wamwe,*

10 era oyu baatu bamanyire baati muutu mulani, owahusa abaana babe bulani, owasangaliranga abageni mu mago gage, owalihitanga abaatu ba Hatonda ni goola n'ohubooga amagulu, owayeedanga abaalinga mu bigosi era owenangayo ohuholera abaatu ebirani ebya buli ngeri.

11 Aye abanamwandu abahisaaba ni gateremuha otabañandiihanga hu lukalala lw'abanamwandu, olwohuba ehy'ohubeeramo año ni babula musinde ni hiribahayisa, balibbwaga endagaano ey'ohwenjayo eyiri Kurisito, baaja bafumbirwa.

12 Ehyo hiribasalira omusango ogw'ohutagumya ehi basuubisa ohuhola oludaayi.

13 N'ehindi, abanamwandu hy'abo batera ohulera engalo n'ohuhena ebiseera byawe ni

* 5:9 5:9 Oba owaali n'atebira piki n'abasinde abandi.

balerenga mu bidaala by'abaatu. Sicehyo hyonyene aye bali ni kalebule era beeyingisa mu bitabanambaho, ni berebula n'ebibatasana huloma.

¹⁴ Ehyo nj'ehigira nahendire abanamwandu abahisaaba ni gateremuha bafumbirwenga, basaale abaana era balabirire amago gaawe, batan̄a Sitaani ngira ey'ohutulomesaho ebibi.

¹⁵ Abanamwandu abandi bahena hale ohugota, balonda Sitaani.

¹⁶ Aye singa nanabengano omuhasi afugiirira Kurisito n'ali n'abanamwandu mu lulyo lulwe, abalabirirenga hiteeyuseho obusito hu hibbubbu hy'abafugiirira Kurisito, ko hisobole ohulabiriranga abanamwandu aban̄umaho ababayeeda.

¹⁷ Abatangirisi abatangirira obulan̄i ehubbubbu hy'abafugiirira, muban̄enga enono n'ebibemeeresano mu bunjeeresa, ko weeyite abo ababuulira n'abasomesa abaatu ehibono hya Hatonda,

¹⁸ olwohuba Ebyan̄andihiwa biroma biiti, "Otasidihanga munwa gw'esaame ni yirima, wayirobeerese ohwaya." Era bimeedahō biiti, "Omutambi asaanira epeera yiye."*

¹⁹ Otangūn̄irisanga hwihirisa ebi baba ni basidiha hu mutangirisi yesiyesi, ohutusaho n'aliho abamulumiiirisa babiri oba badatu.*

²⁰ Aye aban̄eeresese ababbenga, bahayulirenga mu lwijuuye, abandi ko batye.

²¹ Mu ga Hatonda Seefe ni Yesu Kurisito ko n'abamalayika babe abatubona ebi huhola,

* 5:18 5:18 Mag 25:4; Luk 10:7 * 5:19 5:19: Mag 17:6; 19:15

kulagira ohuholanga ebi kulabbiiye ananjuma hwehubbira, wayire ohusalirisa.

²² Otangujirisanga hwise hu baatu emihono jijo ohubaabula ohuba abatangirisi b'ehibbubbu hy'abafugiirira Kurisito, olwohuba ehyo hihanda hyahwingisa mu bibi bya baatu abandi. Yehume osigale n'oli mugwalaafu.

²³ Aye ehyo hitahuletera hunywanga amaaji goonene. Nywangaho n'otwenge tutotono tuhuyeede mu bulumi womu hida hiho n'ohulwalalwala huhwo.

²⁴ Ebibi by'abaatu abandi biba byanjafu era mbibibasingisa omusango aye eby'abandi biba mu ngiso era biboneha luvanyuma.

²⁵ Mu ngeri nj'enyene ebikolwa ebiraji biboneherera. N'ebibi byosi biityo pobiri. Olw'ehyo otangujirisanga hwawula abaatu.

6

Abeedu n'abasengwa baawe

¹ Abafugiirira Kurisito bosibosi aba bataayeho ehijoogi hy'owiidu banjanga abasengwa baawe enono ery'amaani olwohuba hino hiija hunjeesa Hatonda enono n'ohufugiirira hwefe batahufodogola.

² Ate abeedu abali n'abasengwa baawe abafugiirira Kurisito, batanjeeganga baati olwohuba abasengwa baawe balebe baawe mu hufugiirira, banjanga ohubabisyamo emoni. Aye babanjeeresenga bulani n'ohuhiraho, olwohuba abaganyulwamo, bafugiirira bahyawe era abahoda eyi bali. Ebibono bino ebi

kuloma, bisomesenga abafugiirira Kurisito era bahubbirise babiholenga.

Omulungo gw'ebbeesa

³ Omuutu yesiyesi asomesa ebibono ebindi ebitanambagana n'ebibono ebituufu ebiroma hu Musengwa weefe Yesu Kurisito n'esomesa yiye, ebiŋanga ohuyeeda omuutu geebisya mu ngeri esangaasa Hatonda,

⁴ aba geebona era ni geranga omumanyi cooka nga mu butuufu saategeera ebi asomesa. Omuutu oyo anyumirwa bugali ohuŋahana hu biŋamba hu mahulu g'ebyanandiihiwa era aba hy'omugwa eralu. Hino himusaalira omwoyo ogw'ekirihindi, ekayu, ohuŋaha abahye esiro, n'ohuŋeega ati bamulimirira.

⁵ Hino himuŋweramo ohubererera n'anirinana n'abahye abamufaanana, boosi abanjooye hu mazima, abaneega baati ohuhola ebya Hatonda, ngira eyoosa omuutu hu busuni.

⁶ Aye mu hwesiga Hatonda n'ohutanjuduha ehi osunire, pomuli amagoba agasinga.

⁷ Olwohuba ŋanuma ehi hwajire ni nahyo mu hyalo era ŋanuma ehi hulitiina ni nahyo ni huhinwamo.

⁸ Hutabanga n'omwoyo ogw'omuhopo. Ni hunabenga n'ebiryo ebituhena n'ebyambalo ebi hwetaaga, ebyo bituhenenga.

⁹ Aye hyangu abaatu abayayaanira eby'obuninda ohuhemewa, baagwa mu lutuula lwa Sitaani batandiiha ohuhola ebitoola ebiiniha abaatu mu hugota n'ohusihiiriha,

10 Olwohuba omulungo gw'ebbeesa nj'esimuho y'ebibi ebya hiisi ngeri. Olw'omulungo ogwo, abaatu abandi bagotire baanwa mu hufugiirira, nga bereetaho obulumi oweene obungi mu myoyo jaawe.

Ohulabula hwa Pawulo eyiri Temuseewo

11 Aye ewe omuutu wa Hatonda, yenjalenga ebyo byosibyosi. Genderanga mu bugwalaafu n'ohola ebi Hatonda genda n'omwesiga, ni wenda abaatu bosibosi, n'ogumira ebigosi era n'onamba ebiitu pola.

12 Ohufaanana hy'omusooli mu lutalo, weesi nirinjananga ni Sitaani n'obuhenereri ni wesi-gire Hatonda ko osobole ohusuna obulamu obutanwanjo obu gahulangira hu ludaalo olu waat-uliraho lubona ohufugiirira huhwo mu moni j'abangi.

13 Hatonda aña hiisi hiitu obulamu ni Yesu Kurisito owalomera erala amazima mu moni ja Pootiyo Pilaato, nga nj'abajulizi beefe hwembi, kulagira

14 oholenga hiisi ehi Hatonda genda ohole, ohwolera erala olu Musengwa weefe Yesu Kurisito aligobola.

15 Hatonda oyu hujumirya ate nga nje yenene anuga mu mazima, Habaha w'abahabaha era Musengwa y'abasengwa bosibosi, omwene nj'aligobosa Kurisito hu hyalo mu hiseera hihye ehiragaane.

16 Hatonda yenene ali n'obunangi era atafa, owihala mu njase ey'amaani eyiitamo emoni, oyu nabula owaali n'amuweeneho era nga

ŋaŋuma aŋanga ohumubona, omwene oyo abe nj'aŋuga era hiisi muutu amuje eŋono emirembe n'emirembe. Amiina.

Ohulabula eyiri abanjinda

¹⁷ Labula abanjinda abali eyo balehere aŋo ohweŋeegaho wayire ohwesiga obuŋinda ate nga sibubererera. Beesigenga nje Hatonda atunja byosibyosi ebitugasa.

¹⁸ Balome baholenga ebiraŋi, babe baŋinda b'ebiraŋi ebi baholera abahyawwe era babe bahyere ate abagabi.

¹⁹ Ni banaholenga baatyō baja huba hy'abebiihira obuŋinda mwigulu era banaabenga bebbotera omusingi omugumu ohu balyema basuna obulamu obutaliŋwanjo.

²⁰ Temuseewo, huuma bulani obunjeeresa obu bahuŋambya. Oteyingisanga mu huhubba embaha mu by'obusirusiru ebitaŋeesa Hatonda eŋono ebi baatu abandi beedulinga baati mbo nj'amagesi.

²¹ Abaatu abandi bagotire baanwa hu hufugirira baŋamba esomesa eyo ebbaamya.

Ale mwesimwesi, Hatonda abanje ekabi.

**Endagaano Epyaha ko n'ebitabo ebindi
eby'Endagaano Ekayire mu Lunyole
Nyole: Endagaano Epyaha mu Lunyole (Bible)**

copyright © 2019 Wycliffe Bible Translators, Inc.

Language: (Nyole)

Contributor: Wycliffe Bible Translators, Inc.

This is the New Testament in Lunyole of Uganda, with 10 books from the Old Testament.

All rights reserved.

2025-05-17

PDF generated using Haiola and XeLaTeX on 17 May 2025 from source files dated 17 May 2025

e00787cd-838f-597a-9477-00b97e4e2cff